


قورقود دده مه نيسگيللى سوزلریم



بولوت قاراچورلو (سهند)



وب اوچون حاضیر لایان:

کجیل

<http://www.Gajil.20m.com>

گنجه دیر، عالمه چوکوب قارانلیق
افقلر تاپدانیب یئرہ یامانیب
هر یان، قوو وورورسان قولاق توتولور
فیکیرده، دویغودا، دونوب دایانیب

آی کوسوب اوز قویوب زهره یه ساری
گونش یولوب توکوب زرلی ساچلارین
ظلمت بایراق آچیب یئرین اوزونده
دگیشیب عالمین قایدا - قرارین

بیر چاققالدا هورمور، قورددا اولامیر
بایقوشلاردا باشین چکیب قینینا
اولوم قواند گریب یئرین اوزونه
هر شی شبهه لنیر وار اولدوغونا

کوشنی بوروین سوکوت الیندن
سوکوت جانا دویور، فریادا گلیر
دارخیب هوو کوروب هارای چکیرم
دره لر دیسگینیب، داغلار ترپنیر:

- اولدوزلو گویلره - آیلی گویلره
قوزقون کیمی قاناد گه رن بولودلار!
دومانلار ایچیندن، چنلر ایچیندن
جانیمیش بیر انسان سیزی هارایلار!

اهرمنلر، دوزاق قوروب یولومدا
قورخورام - قورخورام من قارانلیقدان!
دیشین شاققیلدادیر، برلدر گوزون
هر کولون دیبیدن، منه بیر شیطان

گونشی سالسادا گنجه قویویا
یئنه ده گویلرده، اولدوز وار، آی وار
دئیر لر گنجه لر یولدان آزانلار
اولدوزلارا باخیب، یولونو تاپار

چکیلین، چکیلین، چکیلین آمان!
عومرومون گویوندن چکیلین بیر آن!
قویون ایشیق سالسین یوللاریما آی
یولومو سوروشوم من اولدوزلاردان

اولدوزلار، اولدوزلار، آمان اولدوزلار
نه دن گوز باسمایب پاریلداشمیر سیز؟
هارداسیز؟ هارادا ایتیپ باتیب سیز؟
نییه ساکیت - ساکیت پیچیلداشمیر سیز؟

یوخسا باتلاقلیقا باتیدی ((بهرام))؟
((کیوانین)) غصه دن بوکولوب بئلی؟
((اولکرین)) سالخیمی پوسگوندن دوشوب؟
((زهره)) نین سازینین قیریلیب تنلی؟

ساتکی بولوتلاردا یوخویا باتیب
بختیمدن گویده بیر شیمشکده شاخماز!
بستانچی بابادا باش آتیپ یاتیب
چاخماغینی چالماز، فنارین یاخماز!

اولدوزلار اوزاقدیر، سمالر درین
انسانا یئردندی وارسا هر هارای
یوز بئله باغیرسام، سیتقاسامدا من
یولونو دگیشمز گونش، اولدوز، آی

هله لیک بو منم، بودا قارانلیق
گوزلریم بره لیر قارا ظلمته
باشین قارانلیقا دویور باخیشیم
بلکه بیر یول آچا نورانیته

آنجاق هر گنجه نین دالی گوندوز دیر
هر بیر فلاکتین قور تولوشو وار
حیاتین یوللاری دره - تپه دی
هر یئیشین ایسه، بیر یوققوشو وار

اورک چوخ دردلنیر، گوز چوخ یاشایر
لاکن حیات بوتون درد و غم دئیل
بو آجی گونلرین، شیرینی ده وار
عومور تک توی دئیل، تک ماتم دئیل

هر دردین داواسین آختارماق گرک
نه چیخار ییخیلیب زار یلداماقدان؟
تلاشیز قوللارین قووتی اولماز
یول گئتمه سه چاتماز مقصده انسان

سحری آختاران گنجه دن قورخماز
آلیرام الیمه تلاش عvasین
اگر گویدن یئرہ قطران یاغسادا
اوزوب گنچمه لییم ظلمت دریاسین

امید هر نه قدر ضعیف اولسادا
بوتون دوگونلری بوشالدار، آچار
امید بیر قیغیلجیم، بیر قور اولسادا
تونقاللار یاندرار، آلولار ساچار

یئنہ باغیر یرام، هارای سسیمدن

دره لر دیلله نیر، داغلار سسلنیر
یئر - گوی فریادیمدان زنهارا گلیر
قایالار دیسگینیر، داشلار ترپنیر

سانکی بیر اشارتی گوز وورور منه
اوزاخدا جانسیز بیر ایشیق پارالایر
اٹله بیل گنجه نین اودویا بیلیر
یادا قارانلیغین باغری چاتلایر

ایشیقدان اوزانان ضعیف شوعالار
باغلانیر کونلومه قزیل بیر ساپ تک
منیده اوزایله چکیر آپاری
او بیر یوماق کیمی، سریتله نرک

قاپی - پنجره سیز بیر آبدده ده
هانسی نیازلی ال بیر شام یاندرمیش
محتاج بیر کونولون بوش التجاسی
بو سونوک اوجاغی ایشیقلاندیرمیش

بوردا کیم وار منه یول نشان وئره؟
بیر برباد بنا دیر، بیر قورتارمیش شام
بو شام چکر اولسا سون نفسلرین
مطلق قارانلیقدا، بوغالاچاغام

هیسلای تاخچالاردا، ساخسی پوسوزلر
اوستونه قات با قات توز - تورپاق قونوب
یاخیلان شاملارین ایستی گوز یاشی
توکولوب، هر یاندا لای با لای دولوب

بوردا بوز باغلایب دونیدیر داشا
حاجتلی گوزلرین توکدیگی یاشلار

باغلی دوگونلری آچانماسادا
منیم گنجه می کی ایشقلاندرار

توزلو پوسوزلری پی له دولدوروب
یاندیریرام، شامین سون شعله سینه
بیر آندا آبدہ چراغبان اولور
سوندیگی شاملارین، گدازه سیله

ایشیق قارانیلیقی قووورائشیگه
گورونور بیر سگگیز بوجاقلی بنا
اونومو قورودیر مرموز بیر جذبه
کونول مفتون اولور باخدیقجان اونا!

تاخچالاردا ییغیم - ییغیم کار - کاغاذ
جیلیدلی - جیلیدسیز، کهنه کیتابلار
باسیلیب باشینا تورپاق اله ییب
زمانلاردان اسیب گلن روزگار

سوادسیز، یازیسز ساده ائللرده
قدیملردن قالان بیر عادتده وار
او هر جور کیتابا، هر جور باسقا
ندنسه مقدس گوزیله باخار

اونا حرمتلی دیر هر یازی، هر خط
نه یاندیرماق اولار، نه آتماق اولار
(شبهه لی اللردن)) احتراس دئییه
قاچیردار مسجده، اوجاغا قویار

اونا گوره ده بو بیغوله لرده
بعضا دوغرونداندا آبدہ لر وار
انسان دویغوسونون خزانه لرین

بو ویرانه لردن، آختارماق اولار

گاهداند ا گورورسن بیر مجاورین
فاجعه قوپارار زیانکار الی
آنلاماز - آنلایار یئر قازار قویلار
کار - کاغذ قاریشیق، بو اینجی لری

ایچیمده درین بیر آختاریش حسسی
((کتابلاری آختار)) دیه - باغیریر!
اٹله بیل گورونمز بیر سس، بیر ندا
تاخچانین ایچبندن منی چاغیریر

کتابلاری بیر - بیر آچیب باخیرام
جوربه جور قرآن دیر آنجاق چوخوسو
بیر آن نفسیمی دالی قایتاریر
قالخان توز - تورپاغین آجی قوخوسو

بودا، مئشین جیلید قالین بیر بیاض
دئییه سن، کهنه بیر ال یازماسی دیر
بوز وراقلارینا قونان لکه لر
تک توز - تورپاق دئییل، زامان پاسیدیر

توستولو پوسوزون دار ایشیغیندا
آچیرام قارشیم کهنه بیاضی
بورنومدا کیفسه میش کاغذین ایگی
گوزومو اوخشاییر گوزل بیر یازی

گوزوم دولاندیقجا وراقلاریندا
بیاضدان بیر قاپی آچیلیر منه
قاپیدا سانکی بیر آت باغلانیدیر
منی آپاراجاق باشقا عالمه

خیالیم سچراییر آتین بئلیته
باخیشلاریم جلو، گوزلریم یوین
یورتیرام کئچمیشین درینلرینه
چاپاراق چیخیرام زامان قیدیندن

گونلر، آیلا، ایللر دالی قاییدیر
قالخیر مزاریندان اولو بابالار
قاریجیق آنالار قوللارین آچیر
منی قارشیلاییر ائلر-اوبالار

آدامی تانیان یئرده قورد یئسین
هامیسی بیر به بیر اوزومدن اوپور
((اوروز)) پیچیلدا بیر ((دلی دوندارا)):
" بیلیم نچه مینجی نوه سییم من "

آذرلر یوردونون شن دوزلرینده
آلاجا سیوانلار یئنه قورولور
شرفیمه بویوک قوناقلیق اولور
دوه لر کسلیلر، قویون قیریلیر

ایتی شرابلارین آغزی آچیلیر
اوجاقلار یاخیلیر، کبابلار پیشیر
هر آن یئنی دسته یئتیشیر یولدان
ارنلر، خاتینلار آتاردان دوشور

الرده صراحی اینجه گوزلر
سو سوناسی کیمی سوزور-سالانیر
دولوب بوشالدیقجا زر پیاله لر
یانقلار گللنیر، توتور-آللانیر

جیران سوروسو تک قیزلار - گلینلر
گولوشور، قاقیشیر چمنلر اوسته
گاهدان توپلانییدوره قورورلار
الوان چیچک کیمی دسته به دسته

اردملی ایگیتلر، قادین آنالار
کیمی صحبت آچیر، کیمی ساز چالیر
کیمی آت اوینادیر، کیمی اوخ آتیر
اثلین شنلیک سسی عرشه اوجالیر

گورک کیملر گلیر قوناقلیقیمما؟
عصرین آدلی - سانلی قهرمانلاری
قاریجیق انالار، قوجا بابالار
اوغوز سویلارینین، اولو خانلاری

((بایندیر خان)) گلیر، ((بیگ اوروز)) گلیر
((قارا گونه)) گلیر، ((خان قازان)) گلیر
((قیان سلجوق)) گلیر، ((بیه رک)) گلیر
((دلی دومرول)) گلیر، ((بوغاج خان)) گلیر...

معرفت یولونون آیدین چراغی
قوجالار قوجاسی، ائلر آتاسی
بئزن میسکینلرین امید دایاغی
بوتون مشکللرین موشگولگشاسی

((قورقود دده)) گلیر الینده قوپوز
اودوملو الینی ارخاما چالیر:
- اوغول ائلریوه خوش گلدین دئییر
هر طرفدن آلقیش سسی اوجالیر

باخیرام ائلیمه، بابالاریمما

باخديقجا فخر يمدن باشيم اوجالير
اوز گونوم، طاليم گلير اونومه
گوزوم آياغيما تيکيلي قالير

اوپورم دده نين جومرد اليني:
- آتا، اوغلون همت ديله يير سندن
ييل كي ائللريمين حالي ياماندير
اسيرگه مه خير دعاوي مندن

زاماندير بيزلره فلک گوز اگيب
پولاد اوز قيلينجلار قيندا پاسلانيب
شاهباز آيغيرلارين پي کسيليب
جيدالار اگيليب، کندير اوفانيب

اودالار تالانيب، ائولر ييخيليب
مرد ايگيتلر اولوب، اوره ک داغلانيب
حصارلار آلينيب، اوردو باسيليب
دوداقلار تيکيليب، قول لار باغلانيب

آلتونلي بان ائولر، تالانا گنديب
ائو ييه سي گنجه کوچه ده ياتير!
بوز بالتاسي کيمي جومرد ايگيتلر
ديوارلار ديبينده پرتقال ساتير!

کولگه لي آغاجلار کوکدن قورويوب
بولاقلار کورلانيب، کهريزلر باتيب
آليجي قوشلارين قانادي سينيب
اسلان ياتاقيند تولکولر ياتيب

اوبالاردا نه توي نه بايرام اولور
نه قوپوز چالينير، نه مرد اويونور

نه بیر اوزان گلیر نغمه اوخویور

نه بدو آتلارین ایچی دویونور

لاله لی دوزلرده تیکان گویه ریب

نه قوزو مه ل شیر، نه جیران قاچیر

قوشلاردا یوردومدان کوسوب گندیبلر

گویده نه بیر دورنا، نه سونا اوچور

معیشت ایگیده آغیر یوک اولوب

کیمی باش گوتورور گندیلر سرگردان

کیمی بالالارین آلیر دیشینه

قاچیر دیاریندان، دوغما یوردوندان!

دوو توشوب دیر ناقسیز نامرد الینه

دیشی باتان یئرین اتین قوپاردیر

دیل آچیب دیلینده دانیشانلارین

چکیر بوغازیندان دیلین چیخاردیر!

بیرجه دار گونلرین دار آخشامیندا

خلقین احوالینا شافاق قان آغلار

قهرمان ائلیوی نه گونه سالمیش

گور بو قارا دوران، گور بو روزگار

بیر اورک آرادان ایکی بولونوب

آیاقدان قانلیدیر، باشدان قانلیدیر

آغ ساچلی آنالار قارا گئیینیب

یاناقدا قانلیدیر، یاشدا قانلیدیر!

اوتانیرام سنه ((اوغلونا)) دئیم

بیلیرم یانیندا قارادی اوزوم

دردی من ائشیدن سنی

سن دوزنمه ینده، من نجه دوزوم؟

وطنین شاماماسی
دوغرانیب دیلیم - دیلیم
تیکیلیب دوداغیم
قاداخلانیب دیلیم
هر پارچام، هر تیکه م
بیر قورد آغزیندا!
بابامین کسگین قیلینجی
پاسلانیب، چورو یوب قیندا
...

نامحرم قوجاقیندا!
مرد ایگیتلریم دارد
بو دیاردا، او دیاردا
...

((آذر لییم)) دئین
پا پاغی قیللی - قیلچیقی
اوز - گوزو سنگر پالچیقی
دونمز جومردلریم...
ییلیمیرم هاردادی...
هار... دا....

قولاغ آس آتا!
بو دردلی اوغلووا قولاغ آس!
هانسی دردی می دئیم؟
هانسی نیسگیلی می دئیم؟
سیزدن سونرا نامردلر
دوغراخ - دوغراخ
دوغرادی دیاریمی
دوغرادیلار ایرانیمی...
بیر ووروشدا
اوزون، اوغلون، نوه سین

قربان وئردی ((شئری)) بابام...

...

آلانمادی قانیمی

بیرده کی ناکورلار

بیر قورو دیلمیده منیم -

ایمدن آلدیلار

بیر قاریش یئریمدنده

منی بایرا سالدیلار

هارای قوپار تدیم

جان آتدیم

اولمادی - اولمادی

ایندی...

اوروشده بدو آت شیبه سیندن

نر اوغول نعره سیندن

سس سمیر یوخدو

الرده قالان آنامین

های... هارای چکمکدن

چیخدی جانی:

بابکیم، کور اوغولوم، شاه اسماعیلیم ها... نی؟

دده ملول - ملول باخیر اوزومه

باخشیندا آیدین بیر اینجیکلیک وار

اولادین پریشان، ناتوان گورسه

شبهه سیز هر آتا مکدر اولار

اوغول نییه مندن همت ایسترسن؟

تورپاق اسیرینین الینده نه وار؟

هر عاشقین بش گون دورانی واردیر

هر عصرین اوزونون بیر ((قورقودو)) وار

کیم اوز ثروتینی قبره آپارمیش؟

یا هانسی آتانی گوردون دونیادا

عمرینده چالیشیب قازانديغینی
بوراخیب گئتمه یه آخیر اولادا؟

من اوز حیاتیمدا هر نه قازانديم
عایلیدان، کمالدان، علم و ذکادان
توخوم ائيله ییین بو یئرده اکدیم
سیزلره تاپشیردیم اولدیگیم زامان

آنجاکی هر اوغولون اوزونه قالیر
آتا ثروتیندن نجور بارینا
بیر گونده کول اندیب گویه سووورا
یاداکی قات - قاتدا، آرتیرا اونا

بیز اگر باش اوجا، ایگیت یاشادیق
نامرده اگمه دیک اونو هئچ زامان
یاد ائلی دشمانا تسلیم اولمادیق
قانیمیز آخدیسا داماریمیزدان

دورد الی توتمادیق بیز بو دونیانی
حیاتی، شرفده، مردلیکده ییلدیک
یاشادیق، شرفلی یاشاماق اوچون
ساواشدیق، ووروشدیق، اولدوردیک، اولدیک

گویلره یورد سالدیق قاراقوش کیمی
قارقاقوزغون اولوب، لئشه قونمادیق
اسلان تک جب لرده یاتاق ائيله دیک
تولکو تک گونده مین کلک یونمادیق

نامرده مرد اولدوق، حقه قول اولدوق
یاخشی، یاخشی اولدوق، یامانا، یامان
السیزلری ازیب آیاخلامادیق
آمانسیز دشمانا، وئرمه دیک آمان

اوغولا نه گرک دده نین مالی
اگر اوغول اولسا، اگر مرد اولسا!
آتانین ثروتی هارا چاتاجاق
اوغول دده سینه یامان درد اولسا!

آتانین آدینی باتیران اوغول
آتانین یوردوندا قالماسا اییدیر
ایگیتده، ایگیت لیک، ناموس، عار گرک
ناموس سیز اوغوللار اولماسا اییدیر!

اوغول نییه مندن همت ایسترسن؟
تورپاق اسیرنین الینده نه وار؟
هر عاشیقین بئش گون دورانی واردیر
هر عصرین اوزونون بیر ((قورقودو)) وار

من اوز زمانه می یاخشی تانیدیم
یاخشی یول گوستردیم، یاخشی یول گتتدیم
ائلیمه اوستاد بیر گمیچی اولدوم
توفانلاردان کئچدیم، ساحله یئتدیم

سنده اوز عصریوی دریندن تانی
گز - دولان زامانین ((قورقودون)) آختار
راکت دورانیندا، آتم عصرینده
اپریمیش ((قورقدان)) سیزه نه چیخار؟

هر زامان باش اوجا یاشماق اوچون
او عصرین هنرین اویرنمک گرک
آتایا گوونمک هنر دئییلدیر
دونیادا هنره گوونمک گرک
گئت قوجا دده دن همت دیله مه

همت وئره جکسن، همتین اولسا!
آتاوین چیراغین یانار ساخلارسان
شرفین، هنرین، غیرتین اولسا!

منیمده الیمدن بو گلیر آنجاق
سنی کئچمیشونله ائيله یم تانیش
باش اوجا یاشاماق ایسته سن اگر
باخ گور بابالارین نئجه یاشارمیش

من بو دونیالاردا گزیشن زامان
بیلمیرم نه ساعت یوخوم آپاریر
یا منیم کونلومو رویالار آلیر
یاداکي پوزوسون یاغی قورتاریر

بیر زامان آیلدیم آچدیم گوزومو
ایشیق قارانیلیقی باسیب بو غوردو
گئجه نین شلمه سی قانا باتمیشدی
سحر آچیلیردی، گونش دوغوردو

((دده مین)) اپریمیش، توزلو کیتاین
بیر آبدە کیمی قوجاقلامیشدیم
گئجه می سحره چاتدیر میشدیمسا
بیر وراخدان آرتیق اوخوما میشدیم

سون